

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI SELASA : 30 NOVEMBER 2021

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 3, 12 HINGGA NO. 38)

**[SOALAN NO 3 DIJAWAB BERSEKALI DENGAN
SOALAN NO 15]**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' HAJI AHMAD NAZLAN BIN IDRIS
[JERANTUT]**

TARIKH : 30 NOVEMBER 2021 (SELASA)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PELANCONGAN, SENI DAN BUDAYA** menyatakan jenis bantuan yang diberikan kepada pengusaha pusat pelancongan yang terkesan dengan masalah wabak COVID-19 agar mereka boleh membuka kembali perniagaan mereka.

JAWAPAN

Tuan Yang di-Pertua,

1. Sebelum saya meneruskan jawapan, izinkan saya untuk menjawab soalan Yang Berhormat Jerantut ini bersekali dengan pertanyaan Yang Berhormat Padang Serai No.15 pada hari ini kerana turut menyentuh perkara yang sama.
2. Kerajaan telah melancarkan beberapa pakej rangsangan ekonomi seperti PENJANA, PEMERKASA, PEMULIH dan PEMERKASA Plus yang bertujuan untuk memulihkan ekonomi dan memastikan kesinambungan perniagaan di samping berusaha mengekalkan pekerjaan rakyat.

NO. SOALAN : 3

3. Antara bantuan khas yang diberikan kepada industri pelancongan yang terjejas akibat pandemik COVID-19 adalah seperti berikut:

- (a) Bantuan khas one-off berjumlah RM6,000 kepada agensi pelancongan yang berdaftar dan berlesen dengan MOTAC termasuk syarikat-syarikat MM2H yang mempunyai lesen inbound di bawah MOTAC;
- (b) Bantuan kewangan one-off RM1,600 kepada pemandu pelancong (Semenanjung Malaysia & Sarawak), manakala bantuan kewangan one-off sebanyak RM2,100 kepada pemandu pelancong Sabah;
- (c) Bantuan khas one-off sebanyak RM600 kepada pengendali inap desa di bawah Program Pengalaman Homestay Malaysia;
- (d) Bantuan Kewangan Geran Khas Prihatin sebanyak RM1,000 secara one-off kepada pengusaha spa dan pusat urutan kaki berdaftar dengan MOTAC;
- (e) Diskaun bil elektrik kepada pengusaha hotel, pengendali taman tema, pusat konvensyen, pusat membeli-belah dan pengusaha pelancongan;
- (f) Pengecualian cukai pelancongan dan cukai perkhidmatan oleh pengusaha hotel sehingga 31 Disember 2021;
- (g) Penangguhan pembayaran ansuran cukai pendapatan bulanan oleh syarikat sehingga 31 Disember 2021; dan
- (h) Sokongan kepada majikan menerusi Program Subsidi Upah.

NO. SOALAN : 3

4. MOTAC juga menyediakan insentif bagi membantu penggiat industri pelancongan untuk terus mampan walaupun terkesan teruk akibat dari pandemik COVID-19 seperti Skim Infrastruktur Pelancongan dan Tabung Khas Pelancongan.
5. Selain itu, penggiat Industri turut disediakan kemudahan *PENJANA Tourism Funding* yang memberi mereka akses kepada pembiayaan untuk menyusun semula keperluan perniagaan mereka.
6. Bagi terus meringankan beban penggiat industri pelancongan yang terjejas berikutan penularan COVID-19, MOTAC juga telah menyediakan bantuan bukan kewangan seperti:
 - (a) Kelonggaran Berkaitan Kompaun;
 - (b) Pengecualian Fi Kepada Pengusaha Pelancongan dan Pemandu Pelancong; dan
 - (c) Kelonggaran Syarat Lesen Kepada Pengusaha Pelancongan.
7. Melalui Bajet 2022 juga, Kerajaan telah mengumumkan komitmen untuk memulihkan dan memangkin beberapa sektor tumpuan. Bagi sektor pelancongan, beberapa inisiatif utama dengan nilai keseluruhan RM1.6 billion telah diumumkan untuk dilaksanakan pada tahun hadapan.

Sekian, terima kasih.

**PEMBERITAHUAN PERTANYAAN JAWAB LISAN
DEWAN NEGARA MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN HAJAH FUZIAH BINTI SALLEH
[KUANTAN]**

TARIKH : 30 NOVEMBER 2020 (SELASA)

SOALAN

PUAN HAJAH FUZIAH BINTI SALLEH [KUANTAN] minta **MENTERI PEMBANGUNAN WANITA, KELUARGA DAN MASYARAKAT** menyatakan secara terperinci dari segi jumlah dan peratusan bakul makanan dari isi rumah yang diketuai oleh wanita dan isi rumah yang diketuai oleh lelaki. Selain itu, mohon perincikan sama ada penerima ini dari golongan B40 atau M40.

JAWAPAN

Tuan Yang di-Pertua,

Kementerian Pembangunan Wanita keluarga dan Masyarakat (KPWKM) melalui Jabatan Kebajikan Masyarakat (JKM) tidak mempunyai data agihan bakul makanan yang diserahkan kepada pemohon yang terdiri daripada ketua isi rumah wanita atau pun ketua isi rumah lelaki. Untuk tujuan memudahkan permohonan, pemohon tidak diperlukan untuk menghantar sebarang dokumen bukti pendapatan dan sebagainya mengambil kira keperluan mendesak akibat ancaman pandemik COVID-19 yang menjejaskan segenap aspek kehidupan masyarakat. JKJ menyantuni semua pemohon yang memerlukan bakul makanan yang dirujuk melalui Bilik Gerakan, Talian Kasih 15999, *Google Form* dan yang hadir ke pejabat. Mereka terdiri daripada yang berkeperluan sama ada lelaki atau perempuan yang disantuni terus berdasarkan permohonan yang diterima. Jabatan tidak memperincikan golongan penerima sama ada daripada B40 atau M40.

Tuan Yang di-Pertua,

Selaras dengan keputusan Mesyuarat Sidang Khas MKN pada 26 Mac 2020, Kerajaan telah bersetuju untuk menyediakan bakul makanan kepada mereka yang memerlukan sepanjang tempoh pandemik COVID-19 yang diuruskan oleh Kementerian. Sejumlah **RM106.83 juta** telah dibelanjakan sepanjang bulan **Mac 2020 hingga Julai 2021** yang memberi manfaat kepada **1,131,385 Ketua Isi Rumah (KIR)**. Sejumlah **RM34.6 juta** menggunakan **Tabung COVID-19** manakala **RM72.2 juta** menggunakan peruntukan Kementerian Kewangan. Nilai bakul bagi agihan Fasa 1 iaitu pada Mac 2020 adalah berjumlah RM50 manakala nilai bakul bagi Fasa 2 dan seterusnya telah dinaikkan kepada RM100.

Susulan dari kejayaan program bakul makanan ini, Kerajaan memutuskan untuk meneruskan program bakul makanan melalui **Program Bakul Prihatin Negara (BPN)** yang dilancarkan pada 15 Julai 2021. BPN merupakan satu program secara kerjasama pintar berkonsepkan “*Whole of Society*” antara Kerajaan, Syarikat Berkaitan

Kerajaan, Syarikat Korporat dan Sukarelawan Skuad Prihatin Negara (SPN) yang berjumlah 19,835 orang. Peruntukan untuk BPN adalah sepenuhnya sumbangan syarikat korporat seperti PETRONAS, AEON (co), Pharmaniaga, Tenaga Nasional Berhad, Telekom Malaysia serta Yayasan Sime Darby. Sejak BPN dilancarkan, dana yang terkumpul dan diuruskan oleh Kementerian melalui Yayasan Kebajikan Negara (YKN) berjumlah **RM21 juta**. Sejumlah **354,200 KIR telah menerima bakul BPN** dan memberi manfaat kepada **lebih 1.4 juta ahli isi rumah**. Bagi program BPN, sebanyak 57% penerima bakul BPN merupakan KIR wanita, manakala 43% merupakan KIR lelaki.

Program BPN ini **telah tamat pada 15 Oktober 2021**, sejajar dengan pembukaan semula sektor ekonomi negara di bawah Pelan Pemulihan Negara. Bagi kes yang masih memerlukan bantuan serta di bawah pendapatan miskin tegar, boleh membuat permohonan bantuan yang bersesuaian di mana-mana Pejabat Kebajikan Masyarakat Daerah yang berdekatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
(TANJONG MANIS)**

TARIKH : 30 NOVEMBER 2021 (SELASA)

SOALAN

TUAN YUSUF BIN ABD. WAHAB (TANJONG MANIS) minta **MENTERI KANAN PENDIDIKAN** menyatakan status pembinaan semula sekolah-sekolah daif di Parlimen Tanjong Manis. Berapa jumlah yang telah siap dan yang akan dilaksanakan pada tahun hadapan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik untuk semua sekolah di seluruh negara termasuk di Sarawak. Ini adalah penting untuk memastikan pengajaran dan pembelajaran dilaksanakan dalam keadaan selamat serta selesa di sekolah.

Untuk makluman Ahli Yang Berhormat, sepanjang tempoh Rancangan Malaysia Ke-11 (RMKe-11) iaitu bagi tahun 2016 sehingga tahun 2020 dan Rancangan Malaysia Ke-12 (RMKe-12) *Rolling Plan 1* (RP1) tahun 2021, sebanyak 14 projek naik taraf dan pembangunan semula sekolah yang mempunyai bangunan daif dengan kos berjumlah RM69.44 juta telah diluluskan bagi Parlimen Tanjung Manis. Sehingga 29 November 2021, sebanyak 5 projek telah siap, 2 projek berada dalam fasa pembinaan dan 7 projek lagi berada dalam fasa pra bina. Kesemua 7 projek yang berada dalam fasa pra bina dijangka akan dimulakan pelaksanaannya pada tahun 2022.

Untuk makluman Ahli Yang Berhormat, tiada projek baharu yang diluluskan di Parlimen Tanjung Manis dalam Rancangan Malaysia Ke-12 *Rolling Plan 2* (RP2) tahun 2022 bagi program menaiktaraf dan pembangunan semula bangunan daif di sekolah. Walaubagaimanapun, terdapat satu projek baharu bagi pembinaan bangunan 12 bilik darjah dan lain-lain kemudahan di SMK Semop, Daro, Sarawak.

KPM sentiasa komited untuk memastikan sekolah dalam keadaan baik dan selamat digunakan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN AHMAD BIN HASSA [PAPAR]

TARIKH : 30 NOVEMBER 2021 (SELASA)

SOALAN

TUAN AHMAD BIN HASSAN [PAPAR] minta **MENTERI PERTANIAN DAN INDUSTRI MAKANAN** menyatakan jenis bantuan yang disediakan Kementerian kepada nelayan pantai di Sabah khususnya nelayan di Parlimen Papar sejak pandemik COVID-19 sehingga kini.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sememangnya prihatin dengan masalah yang dihadapi oleh nelayan-nelayan pesisir pantai khususnya semasa pandemik Covid-19. Pelbagai bentuk bantuan disediakan dan diberikan kepada nelayan yang terjejas khususnya nelayan di Parlimen Papar seperti:

- i. Bantuan Elaun Sara Hidup Nelayan (ESHN) berjumlah RM300.00 sebulan. Sehingga Oktober 2021, seramai 360 orang nelayan di Papar telah menerima ESHN dengan nilai RM863,998.80;

- ii. Subsidi Minyak Diesel dan Petrol bagi menampung sebahagian dari kos operasi penangkapan ikan nelayan akibat dari kenaikan harga bahan api di pasaran. Seramai 258 pemilik vesel di Papar menerima manfaat ini sehingga Oktober 2021 dengan jumlah minyak subsidi petrol yang telah disalurkan sebanyak 355,778 liter;
- iii. Bantuan Sabah Prihatin adalah bantuan secara *one-off* sebanyak RM300;
- iv. Skim Perlindungan Nelayan diperkenalkan bertujuan untuk membela nasib keluarga nelayan sekiranya berlaku kejadian yang tidak diingini atau kemalangan yang melibatkan nelayan. LKIM mencarumkan nelayan di bawah Pertubuhan Keselamatan Sosial (PERKESO) dengan caruman tahunan sejumlah RM157.20. Data sehingga Oktober 2021 merekodkan seramai 370 orang nelayan di Papar yang dicarumkan dengan nilai sebanyak RM58,164;
- v. Bantuan Bencana Alam adalah bantuan dan sumbangan segera dalam bentuk kewangan kepada nelayan yang mengalami kemalangan, kemusnahan atau kerosakan harta benda dan kehilangan nyawa bagi meringankan beban mangsa dan keluarga. Bagi tahun 2021, seramai 19 orang penerima bantuan telah direkodkan dengan nilai bantuan sejumlah RM15,500;
- vi. Program Dana Nelayan bagi membantu menyediakan pinjaman mudah bagi pembelian bot dan peralatan baru atau meningkatkan keupayaan bot sedia ada. Seramai 429 penerima bantuan direkodkan di seluruh Negeri Sabah melibatkan peruntukan sebanyak RM4.2 juta. Seramai 99 penerima adalah daripada daerah Papar dengan nilai sebanyak RM990,000;
- vii. Bantuan bekalan makanan (*food basket*) untuk membantu meringankan beban yang dihadapi oleh golongan nelayan di daerah Papar yang terkesan dengan wabak pandemik Covid-19. Seramai 220 penerima bantuan di daerah Papar telah direkodkan sehingga Oktober 2021 dengan nilai RM22,000;

- viii. Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan melibatkan insentif *in-kind* yang diberikan kepada peserta dalam bentuk input pertanian, tenaga kerja, latihan dan khidmat nasihat teknikal serta elemen pemasaran hasil pertanian. Penerima bantuan daripada daerah Papar adalah seramai 20 orang dengan nilai bantuan sebanyak RM20,000;
- ix. Pembinaan unjam-unjam dan tukun tiruan bagi menambah sumber perikanan dan meningkatkan lokasi-lokasi tangkapan ikan khusus kepada nelayan tradisi dan persisiran pantai. MAFI melaksanakan projek pembinaan unjam-unjam di pesisir perairan Papar melibatkan tiga (3) lokasi dengan nilai peruntukan sebanyak RM1,500,000 (Peruntukan pampasan daripada SOGT). Lokasi tersebut adalah seperti berikut:
- | | | | |
|------|-------------|---|---------------------------|
| i) | Kuala Papar | - | 1,500 Unit / Jenis Kuboid |
| ii) | Beringis | - | 1,500 Unit / Jenis Kuboid |
| iii) | Pengalat | - | 1,500 Unit / Jenis Kubiod |
- x. Program Pengembangan dan Perkhidmatan Perikanan Marin yang menawarkan pelbagai khidmat nasihat, kursus dan latihan in-situ kepada nelayan-nelayan melalui program bimbingan nelayan; dan
- xi. Projek Pembangunan Hiliran Perikanan yang mensasarkan kepada pemprosesan berasaskan produk perikanan dan memberikan bantuan dalam bentuk peralatan pemprosesan, khidmat nasihat dan teknikal terutamanya kepada isteri-isteri para nelayan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK MOHD AZIS BIN JAMMAN
[SEPANGGAR]**

TARIKH : 30 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan kadar penembusan jalur lebar mudah alih, internet dan jalur lebar berkelajuan tinggi di Sabah dan langkah-langkah yang diambil bagi menambah baik kualiti perkhidmatan khususnya di kawasan luar bandar dan pedalaman.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah menghasilkan Pelan Jalinan Digital Negara (JENDELA), yang bertujuan untuk menangani isu akses kepada Internet berkualiti bagi perkhidmatan tetap dan mudah alih.

Setakat suku kedua tahun 2021, kadar penembusan jalur lebar mudah alih di Sabah adalah sebanyak 88% bagi setiap 100 penduduk, manakala bagi jalur lebar talian tetap pula adalah sebanyak 20.9% bagi setiap 100 premis.

Antara inisiatif untuk menambahbaik infrastruktur digital di Sabah melalui Pelan Jalinan Digital Negara (JENDELA) di bawah Fasa 1 setakat 31 Oktober 2021 adalah seperti berikut:

SOALAN NO : 16

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
Negeri	Perancangan	Siap	Perancangan	Siap	Perancangan	Siap	Pelaksanaan	Siap
Sabah	538	52	3,500	2,337	251,165	109,408	138	-

Secara umumnya pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

Untuk makluman Ahli Yang Berhormat juga, peratusan liputan 4G di kawasan berpenduduk di Sabah telah meningkat kepada 83.90% pada suku ketiga 2021 berbanding 73.41% sebelum pelaksanaan JENDELA pada suku ketiga 2020. Usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaik taraf serta premis-premis yang mendapat akses gentian optik bagi memastikan keperluan rakyat sentiasa diutamakan.

Para pengguna digalakkan untuk melayari portal *JENDELA Map* (<https://jendela.my>) yang telah dilancarkan pada Julai lepas, bagi melaporkan lokasi yang kurang mendapat liputan agar boleh dimasukkan ke dalam perancangan masa hadapan. Maklumat yang diperoleh daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbahbaikan liputan dan kualiti perkhidmatan jalur lebar dari semasa ke semasa.

Tuan Yang Dipertua,

Selain daripada pembinaan menara-menara telekomunikasi dan satelit, Pihak Kerajaan akan turut melaksanakan Penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Pelaksanaan PoP bagi Fasa 1 akan melibatkan 630 lokasi berhampiran sekolah manakala bagi Fasa 2 pula akan melibatkan 3,693 lokasi berhampiran sekolah di kawasan luar bandar di seluruh negara.

Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap menjelang akhir RMK-12 Tahun 2025. Keseluruhan jumlah PoP di kawasan luar bandar di negeri Sabah adalah sebanyak 695. Manakala jumlah PoP di kawasan Parlimen Sepanggar adalah 6.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 30 NOVEMBER 2021 (SELASA)

SOALAN

TUAN AHMAD TARMIZI BIN SULAIMAN [SIK] minta **MENTERI TENAGA DAN SUMBER ASLI** menyatakan langkah penggubalan Dasar Mineral Negara termasuk perlombongan sumber asli baharu iaitu nadir bumi.

JAWAPAN

Tuan Yang di-Pertua,

1. Dasar Mineral Negara 2 (DMN2) yang dilancarkan pada 22 Januari 2009, telah digubal dengan memberikan penekanan terhadap usaha meningkatkan sumbangan sektor mineral terhadap pembangunan sosio-ekonomi negara melalui pembangunan sumber mineral yang efisien, bertanggungjawab dan mapan di samping penggunaan sumber-sumber mineral secara optima tanpa mengabaikan kelestarian alam sekitar.
2. DMN 2 telah digubal bagi tujuan untuk memastikan pembangunan yang mapan dan penggunaan sumber mineral secara optima, untuk mempromosikan penerajuan terhadap alam sekitar bagi memastikan sumber mineral negara dibangunkan secara mesra alam sekitar, bertanggungjawab dan mampan, untuk mempertingkatkan daya saing dan kemajuan sektor mineral di arena global, untuk memastikan penggunaan mineral tempatan dan mempromosikan lagi pembangunan produk berasaskan mineral, dan untuk menggalakkan perolehan, kitar semula dan guna semula logam dan mineral.
3. Bagi tujuan itu, DMN 2 telah dirangka berdasarkan beberapa teras utama antaranya pengembangan sektor mineral, penerajuan alam sekitar, pewujudan informasi mineral yang bersepadu serta penglibatan komuniti dan tanggungjawab sosial.
4. Selaras dengan keperluan untuk membangunkan industri mineral ke arah yang lebih berdaya saing dan mampan, Kerajaan telah meneliti semula dasar-dasar sedia ada agar dapat menterjemahkan hasrat Kerajaan. Oleh itu, Kementerian Tenaga dan Sumber Asli menggubal satu pelan yang khusus iaitu Pelan Transformasi Industri Mineral 2021-2030 (TIM 2021-2030) untuk membangunkan industri mineral secara komprehensif merangkumi semua aktiviti dalam rantai industri mineral daripada peringkat hulu hingga hilir dengan penekanan kepada aktiviti penambahan nilai kepada sumber mineral.

5. Kerangka Pelan TIM 2021-2030 dibangunkan berdasarkan 5 teras utama seperti berikut:

- (i) Teras 1: Tadbir urus dan Perundangan;
- (ii) Teras 2: Pembangunan Rantaian Nilai Industri Mineral;
- (iii) Teras 3: Inventori dan Pemetaan Sumber Mineral;
- (iv) Teras 4: Teknologi dan Inovasi; dan
- (v) Teras 5: Pembangunan Modal Insan

6. Pelaksanaan Pelan TIM 2021-2030 akan dipacu oleh visi dan misi yang jelas dan menyeluruh. Kementerian Tenaga dan Sumber Asli merumuskan visi untuk menjadi **“Peneraju Utama Pembangunan Industri Mineral Negara Menjelang 2030”** sebagai agenda utama yang perlu dicapai dan dipandu melalui misi **“Ke Arah Pembangunan Industri Mineral Yang Mampan”**. Ia memberi gambaran jelas bahawa usaha kerajaan bukan sahaja tertumpu kepada pembangunan industri mineral semata-mata, malahan turut mengamalkan konsep pembangunan secara mampan bagi mengekalkan kelestarian alam sekitar.

7. Berhubung dengan perlombongan unsur nadir bumi pula, Kerajaan menyedari potensi untuk pembangunan industri berkaitan mineral tersebut dan dalam proses penyediaan dokumen berkaitan Prosedur Operasi Standard Pembangunan Unsur Nadir Bumi Bukan Radioaktif (NR-REE). Ini bagi memastikan pembukaan lombong NR-REE bukan sahaja dapat dikembangkan secara efektif malahan industri ini akan dapat dijalankan secara bertanggung jawab dan mampan selaras dengan dasar-dasar yang telah ditetapkan oleh Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DR. ONG KIAN MING [BANGI]
TARIKH : 30 NOVEMBER 2021 (SELASA)

SOALAN

DR. ONG KIAN MING [BANGI] minta **MENTERI KEWANGAN** menyatakan langkah-langkah yang sedang diambil untuk mengalakkan sektor insurans dinegara ini untuk memperkenalkan produk insurans yang baru yang melibatkan perlindungan insurans COVID-19 seperti perlindungan gangguan perniagaan (*business interruption*) akibat daripada COVID-19.

JAWAPAN

Tan Sri Yang di-Pertua,

1. Perlindungan “*Business Interruption, BI*” yang sedia ada di Malaysia kebiasaannya ditawarkan sebagai tambahan (“*add-on*”) kepada polisi insurans kebakaran dan meliputi gangguan perniagaan yang disebabkan oleh kejadian seperti banjir, kilat, kebakaran dan/ atau kerosakan yang berlaku di premis perniagaan atau pejabat.
2. Kerugian yang diakibatkan oleh gangguan perniagaan yang berpunca daripada perintah berkurang (contoh: kuarantin atau perintah kawalan pergerakan) kerana wabak COVID-19 lazimnya tidak termasuk sebagai risiko yang dilindungi di bawah polisi insurans BI yang sedia ada di Malaysia, sama seperti di negara-negara lain. Ini disebabkan oleh kesukaran untuk menilai kebarangkalian dan potensi tahap kerugian risiko, serta kekurangan sokongan penanggung insurans semula.
3. Bagi menyokong pembukaan semula ekonomi dan aktiviti ekonomi, pihak Kerajaan, Bank Negara Malaysia serta industri insurans dan takaful sedang mengkaji langkah untuk menggalakkan penawaran insurans BI berkaitan risiko pandemik atau endemik di Malaysia. Ini mungkin melibatkan perkongsian risiko antara pihak Kerajaan dan pihak swasta untuk membolehkan akses perlindungan yang lebih meluas dan mampan, serta menyokong kapasiti pasaran untuk mengunderait risiko tersebut pada tahap premium atau sumbangan yang lebih mampu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJI AHMAD JAZLAN BIN YAAKUB
[MACHANG]**

TARIKH : 30 NOVEMBER 2021 (SELASA)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI PELANCONGAN, SENI DAN BUDAYA** menyatakan apakah langkah yang telah diambil oleh Kementerian dalam menggalakkan semula pelancongan domestik khususnya di Kelantan yang dilaporkan telah kerugian sebanyak RM2.6 bilion kesan dari pandemik ini.

JAWAPAN

Tuan Yang di-Pertua,

1. Bagi menggalakkan semula pelancongan domestik di seluruh negara, Kementerian Pelancongan, Seni dan Budaya (MOTAC) menerusi Tourism Malaysia telah melaksanakan pelbagai inisiatif yang turut memanfaatkan pelancongan di Kelantan, antaranya:

- (i) Pelancaran semula Pakej Cuti Penjawat Awam dan Pesara Kerajaan sempena kempen Cuti-Cuti Malaysia pada 31 Oktober 2021 di Kota Bharu, Kelantan, sebagai sebuah destinasi pelancongan yang mempunyai keunikan warisan alam, kesenian, kebudayaan, kraftangannya yang tersendiri.

- (ii) Bekerjasama dengan Petron Malaysia bagi pelancaran Kempen 'Jom Jalan Jalan', dengan memberi ganjaran kepada pelanggan dengan hadiah menarik termasuk pakej percutian dengan ganjaran wang tunai untuk meneroka lokasi pelancongan dalam negara. Ini seterusnya akan menyumbang kepada pemulihan ekonomi melalui aktiviti pelancongan di kawasan ekonomi setempat.
 - (iii) Penyertaan dalam pameran 'MATTA Fair' dengan membangunkan Pavilion Tourism Malaysia dijadikan sebagai pusat penjualan pakej-pakej percutian domestik oleh agensi-agensi pelancongan tempatan di samping menjadi lokasi utama bagi perasmian pakej dan produk baru pelancongan.
2. Di samping itu, bagi memastikan seni, budaya dan tradisi masyarakat Kelantan terus segar dikenali dan dijiwai, Jabatan Kebudayaan dan Keseniaan Negara (JKKN) telah melaksanakan program 'Festival Kesenian Rakyat Kelate' secara maya pada 16 dan 17 Julai 2021 bagi memperkenalkan keunikan seni budaya tradisi masyarakat Kelantan yang akan menarik minat orang ramai untuk melawat negeri ini. Antara program yang dikongsikan adalah persembahan pentas Dikir Barat dan Mak Yung, pertandingan seperti Pertandingan Nyanyian Lagu Daerah dan Tarian Wau Bulan Kreatif Pertandingan Nyanyian Lagu Daerah Kelantan, demonstrasi masakan tradisional dan permainan tradisional Kelantan; dan
3. Selain itu, selaras dengan pembukaan ekonomi dan kebenaran rentas negeri secara berfasa, MOTAC menerusi pejabatnya di negeri Kelantan juga telah mengadakan sesi libat urus dengan Kerajaan Negeri dan penggiat-penggiat industri bagi bersama-sama membangunkan serta langkah-langkah pematuhan Prosedur Operasi Standard (SOP) di lokasi-lokasi tumpuan pelancong seperti Pasar Malam Wakaf Che Yeh, Pasar Siti Khadijah dan dua (2) kawasan bebas cukai di Rantau Panjang dan Pengkalan Kubor.

4. MOTAC juga telah diperuntukkan sebanyak RM1.4 juta di bawah *Rolling Plan* Pertama, Rancangan Malaysia Kedua Belas, Tahun 2021 untuk membiayai empat (4) projek pembangunan serta penyelenggaraan baharu di negeri Kelantan bagi memastikan produk dan perkhidmatan pelancongan yang diberikan adalah berkualiti tinggi. Projek-projek tersebut adalah:

- (i) Peningkatan Kemudahan Pelancongan Pantai Bisikan Bayu, Pasir Puteh;
- (ii) Membaikpulih Struktur Bangunan serta Penyelenggaraan Kemudahan Istana Jahar, Kota Bharu;
- (iii) Membaikpulih Struktur Tangga Luar Bangunan serta Penyelenggaraan Kemudahan Lanskap Muzium Perang (Bank Kerapu), Kota Bharu; dan
- (iv) Menaiktaraf Kemudahan Pelancongan Taman Eko Rimba Bukit Bakar, Machang.

5. Dalam usaha merancakkan pelancongan di negeri Kelantan, MOTAC turut merancang untuk mencalonkan Laman Warisan Serunding Kampung Laut dan Masjid Kampung Laut untuk dijadikan Tapak Warisan Dunia di bawah UNESCO dalam kategori Tapak Warisan Kebangsaan dan Objek Warisan. Kedua-dua projek ini memenuhi kriteria sebagai lokasi tradisi budaya dan juga contoh seni bina luar biasa yang unik. Jika berjaya, ia pastinya dapat meningkatkan daya tarikan negeri Kelantan, seterusnya meningkatkan ketibaan pelancong ke negeri tersebut dan pendapatan pelancongan tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : DR. LEE BOON CHYE [GOPENG]

TARIKH : 30 NOVEMBER 2021 (SELASA)

SOALAN

DR. LEE BOON CHYE [GOPENG] minta **MENTERI PERTANIAN DAN INDUSTRI MAKANAN** menyatakan apakah perancangan Kementerian untuk memulihkan RTC Gopeng sebagai pasar borong hasil pertanian.

JAWAPAN

Tuan Yang Di Pertua,

Untuk makluman Ahli Yang Berhormat, Pusat Transformasi Luar Bandar (RTC) Gopeng, Perak merupakan pusat perkhidmatan setempat yang dikenali sebagai 'Satu Hentian Pelbagai Perkhidmatan'. Tiga (3) fungsi utama RTC Gopeng ialah untuk menyediakan perkhidmatan kerajaan dan swasta mengikut keperluan penduduk setempat, berperanan sebagai hub perniagaan serta menyediakan kemudahan fasiliti seperti dewan serbaguna dan pusat kegiatan belia. RTC Gopeng tidak lagi digunakan sebagai pasar borong pertanian.

Kajian prospektif RTC Gopeng telah dibentangkan pada 26 Julai 2021. Berdasarkan hasil kajian tersebut, empat (4) cadangan sedang dilaksanakan bagi membantu usahawan di RTC Gopeng terus kekal dan relevan iaitu menjadikan RTC Gopeng sebagai hub pemasaran dan pengedaran, menjadikan RTC Gopeng sebagai hub pemasaran dalam talian dan luar talian, menambahbaik strategi perniagaan trak makanan dan membangunkan Taman Terrarium iaitu taman rekreasi & tapak semaian.

- i. Menjadikan RTC Gopeng sebagai hub pemasaran produk segar dan sejuk beku – di bawah cadangan ini, Blok A akan dinaiktaraf sebagai Pusat Edaran FAMACO, pusat pengedaran susu segar jenama '*farm fresh*' dan pusat *Food Bank* bagi wilayah utara. Blok B pula akan dibangunkan melalui kerjasama strategik dengan Halal Corporation Perak serta pihak swasta di bawahnya untuk melaksanakan aktiviti pemprosesan, pembungkusan dan pemasaran bagi produk sejuk beku berasaskan ayam seperti sosej, keratan ayam seperti peha, sayap, dada dan sebagainya.
- ii. Menjadikan RTC Gopeng sebagai hub pemasaran *online* dan *offline* – RTC Gopeng akan dibangunkan sebagai *Hub Agro E-Commerce* melalui platform Agrobazaar Online serta kolaborasi bersama Shopee dengan sasaran untuk menjadikan RTC Gopeng sebagai pusat sehenti 100 SKU produk industri makanan keluaran

usahawan tempatan. Selain itu, RTC Gopeng juga berperanan sebagai pusat pengumpulan Produk Industri Makanan keluaran golongan Asnaf dari seluruh Perak yang melibatkan sebanyak 50 SKU.

- iii. Strategi Perniagaan Trak Makanan dan Gerai Buah-Buahan - FAMA juga menaiktaraf fasiliti Medan Trak Makanan atau *food truck* dan Gerai Buah-buahan Segar (GBBS) di RTC Gopeng yang memberi manfaat langsung kepada 12 usahawan dan 30 pembekal hasil-hasil pertanian. Sebagai daya tarikan dan pelengkap produk makanan, FAMA juga menyediakan kios makanan dan produk proses yang memberi manfaat langsung kepada enam (6) orang usahawan setempat.
- iv. Membangunkan taman terrarium - Pusat rujukan pertanian telah dibangunkan di RTC Gopeng yang berperanan sebagai medium pembelajaran kepada bakal petani baharu terutamanya yang berminat dengan kaedah penanaman secara hidroponik dan fertigasi moden. Selain itu, pusat jualan florikultur juga sedang dibangunkan di mana apabila siap kelak, ia akan berperanan sebagai pusat jualan tapak semaian yang memberi manfaat kepada lima (5) orang usahawan tempatan.. Bagi menarik minat pengunjung terutamanya golongan muda dan belia, RTC Gopeng juga akan dilengkapi dengan ruang atau sudut yang *instagrammable* seperti sudut bergambar, struktur arca, penggunaan warna-warni dan lain-lain lagi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT (JERAI)

TARIKH : 30 NOVEMBER 2021 (SELASA)

SOALAN

TUAN SABRI BIN AZIT (JERAI) minta **MENTERI KANAN PENDIDIKAN** menyatakan apakah langkah yang diambil bagi mengurangkan beban tugas yang dihadapi oleh Ketua Panitia Sekolah di seluruh negara agar mereka dapat memberi fokus kepada peningkatan profesionalisme guru dan program peningkatan prestasi murid.

JAWAPAN

Tuan Yang di-Pertua,

Kementerian Pendidikan Malaysia (KPM) prihatin terhadap beban tugas guru dan sentiasa mencari kaedah terbaik bagi mengatasi perkara ini di sekolah.

Untuk makluman Ahli Yang Berhormat, tugas yang dilaksanakan oleh Ketua Panitia Sekolah adalah merangkumi hal ehwal pengurusan serta pentadbiran panitia mata pelajaran. Selain itu, ketua panitia juga turut melaksanakan tugas pengajaran dan pembelajaran mengikut opsyen masing-masing. Dalam hal ini, pihak sekolah diberi autonomi untuk menguruskan dokumen panitia seperti fail-fail yang boleh disimpan dalam bentuk salinan digital (*soft copy*) atau salinan keras (*hard copy*). Ini bagi memastikan pengurusan panitia di sekolah menjadi lebih efisien dan dapat mengurangkan beban tugas ketua panitia di sekolah. Walau bagaimanapun, jawatan ketua panitia di sekolah bukanlah jawatan hakiki dan boleh dilantik oleh pentadbir sekolah secara penggiliran dalam kalangan guru-guru bagi opsyen mata pelajaran berkenaan.

KPM akan terus memastikan beban tugas guru diberikan perhatian dengan mengambil langkah yang berkesan dalam usaha untuk meningkatkan profesionalisme guru dan prestasi murid.

KPM komited dalam memastikan semua guru dapat memberi fokus kepada peningkatan profesionalisme guru dan program peningkatan prestasi murid.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN CHAN MING KAI [ALOR SETAR]
TARIKH : 30 NOVEMBER 2021 (SELASA)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan berapa jumlah tunggakan cukai pendapatan individu dan syarikat yang masih belum dikutip oleh LHDN, senaraikan dalam pecahan mengikut Banjaran Pendapatan Bercukai.

JAWAPAN

Tan Sri Yang di-Pertua,

1. Untuk makluman Ahli Yang Berhormat, sehingga 31 Disember 2020, jumlah tunggakan cukai pendapatan yang masih di dalam proses kutipan oleh Lembaga Hasil Dalam Negeri Malaysia, atau LHDNM bagi cukai pendapatan individu adalah sebanyak 10.4 bilion ringgit, dan melibatkan 1,032,240 individu. Manakala bagi cukai pendapatan syarikat pula adalah sebanyak 22.8 bilion ringgit, melibatkan 160,048 syarikat.
2. Berkenaan statistik tunggakan cukai mengikut banjaran pendapatan bercukai, pecahan tidak dapat disediakan kerana tunggakan bagi setiap pembayar cukai adalah berbeza berdasarkan taksiran pendapatan setiap tahun.
3. Di samping itu, seorang pembayar cukai boleh mempunyai amaun tunggakan cukai melebihi dari satu tahun taksiran, atau pola pendapatan bercukai berlainan yang menyebabkan kesukaran untuk mengaitkan jumlah amaun tunggakan pembayar cukai mengikut banjaran pendapatan bercukai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 30 NOVEMBER 2021 (SELASA)

SOALAN

DATO' SRI RICHARD RIOT ANAK JAEM [SERIAN] minta **MENTERI KEWANGAN** menyatakan kesediaan Kementerian untuk membuka sekurang-kurangnya sebuah bank di bandar Mutiara, Daerah Tebedu.

JAWAPAN

Tan Sri Yang di-Pertua,

1. Kementerian Kewangan sedia maklum bahawa pada masa ini tiada cawangan bank di bandar Mutiara, daerah Tebedu, Sarawak. Walau bagaimanapun, terdapat 2 ejen Bank Simpanan Nasional (BSN) dan 1 ejen Agrobank di sekitar Bandar Mutiara, Mukim Tebedu serta kemudahan sebuah Terminal Layan Diri (atau *Self-Service Terminal*, SST) yang dilengkapi dengan Mesin Pengeluaran Wang (*Automated Teller Machine*, ATM) dan Mesin Deposit Wang (*Cash Deposit Machine*, CDM) milik Bank Rakyat di station Petronas Tebedu. Secara umumnya, faktor-faktor yang diambil kira oleh sesebuah institusi kewangan dalam membuat penilaian bagi pembukaan cawangan antara lain ialah kesesuaian lokasi, infrastruktur dan persekitaran, keperluan serta permintaan perkhidmatan kewangan seiring dengan pembangunan setempat.

2. Selain daripada cawangan, terdapat saluran alternatif telah disediakan oleh institusi kewangan bagi menyokong dan meningkatkan penyampaian kemudahan asas perkhidmatan perbankan di kawasan luar bandar. Antaranya termasuk penyediaan ejen bank yang menawarkan beberapa perkhidmatan kewangan asas seperti penyimpanan dan pengeluaran deposit, khidmat pemindahan dana, pembukaan akaun, pembayaran balik pembiayaan dan pembayaran bil utiliti. Ejen bank terdiri daripada entiti perniagaan seperti kedai runcit, stesen minyak, pejabat pos, dan koperasi yang dilantik oleh pihak institusi perbankan seperti BSN, Agrobank, Bank Rakyat, Maybank, RHB Bank dan Bank Islam untuk menyediakan perkhidmatan perbankan asas, terutamanya di kawasan pedalaman. Penggunaan ejen bank untuk melakukan transaksi kewangan adalah memberangsangkan dengan jumlah transaksi ejen bank mencatatkan kenaikan sebanyak 61% semenjak mula beroperasi pada tahun 2012 dan telah mencapai jumlah transaksi sebanyak RM18.5 bilion pada tahun 2020.

3. Di samping itu, inisiatif cawangan bank bergerak dan ATM MEPS bergerak juga telah dilaksanakan di Sarawak yang disertai oleh empat

institusi kewangan iaitu BSN, RHB Bank, Bank Rakyat dan Agrobank. Unit-unit bank bergerak pada peringkat permulaan ini meliputi kawasan-kawasan di sekitar Sungai Asap, Sebauh, Tatau, Nyalau, Kuala Tatau, Asajaya, Sadong Jaya dan Padawan. Pihak Bank Negara Malaysia bersama Kementerian Kewangan sedang berusaha untuk meluaskan inisiatif Bank Bergerak di bawah Pelan PEMULIH yang dijangka dapat memanfaatkan lebih ramai rakyat di kawasan luar bandar Sarawak. Di bawah inisiatif PEMULIH ini, seluruh negeri Sarawak, termasuk mukim Tebedu telah disenaraikan sebagai keutamaan bagi menerima perkhidmatan Bank Bergerak mengikut kesesuaian lokasi, infrastruktur dan persekitaran, keperluan serta permintaan perkhidmatan kewangan seiring dengan pembangunan setempat. Antara perkhidmatan perbankan asas yang akan ditawarkan termasuk penyimpanan dan pengeluaran wang, serta khidmat nasihat mengenai perbankan secara digital.

4. Kementerian Kewangan dan Bank Negara Malaysia juga menggalakkan rakyat untuk melakukan urusan perbankan secara digital, termasuk menerima bayaran bantuan kerajaan melalui akaun bank, di mana transaksi perbankan boleh dilakukan di mana-mana dan pada bila-bila masa sahaja secara selamat. Perbankan digital juga diharap akan dapat meluaskan jangkauan perkhidmatan kewangan kepada kawasan-kawasan luar bandar, agar pengguna di seluruh Malaysia boleh mendapat manfaat daripada akses dan penggunaan perkhidmatan kewangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 30 NOVEMBER 2021 (SELASA)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI KEWANGAN** menyatakan :

(a) beberapa hasil pendapatan Kerajaan dari cukai ke atas 22 kali cabutan khas perjudian nombor ramalan dan berapa hasil pendapatan Kerajaan dari cukai semua jenis perjudian; dan

(b) adakah hasil cukai perjudian dimasukkan ke dalam akaun Kumpulan Wang Disatukan.

JAWAPAN

Tan Sri Yang di-Pertua,

Terima kasih Yang Berhormat di atas soalan yang telah dikemukakan.

Untuk makluman ahli Yang Berhormat, jumlah kutipan hasil cukai ke atas cabutan khas perjudian nombor ramalan sehingga 31 Oktober 2021 adalah RM49.99 juta. Sebagai perbandingan, jumlah kutipan bagi tahun 2020 ialah sebanyak RM72.53 juta dan bagi tahun 2019 pula, sebanyak RM113.29 juta. Jumlah kutipan bagi aktiviti perjudian yang dilesenkan sehingga 31 Oktober 2021 pula, ialah RM834.46 juta berbanding kutipan tahun 2020 sebanyak RM1.72 bilion dan 2019 sebanyak RM3.44 bilion. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN
CHIK (BALIK PULAU)**

TARIKH : 30 NOVEMBER 2021 (SELASA)

SOALAN

TUAN MUHAMMAD BAKHTIAR BIN WAN CHIK (BALIK PULAU) minta **MENTERI KANAN PENDIDIKAN** menyatakan sama ada Kementerian bersedia untuk bekerjasama dengan pertubuhan antarabangsa seperti UNESCO bagi memasukkan subjek seni dan budaya sebagai langkah menghubungkan pelajar dengan budaya warisan mereka sepertimana yang telah dijalankan di Kemboja.

JAWAPAN

Tuan Yang di-Pertua,

Untuk makluman Ahli Yang Berhormat, Kurikulum Standard Prasekolah Kebangsaan (KSPK), Kurikulum Standard Sekolah Rendah (KSSR) dan Kurikulum Standard Sekolah Menengah (KSSM) turut menerapkan kurikulum kesenian dan kebudayaan.

Kurikulum kesenian dan kebudayaan telah digubal dengan mengambil kira Dasar Kebudayaan Kebangsaan yang dikeluarkan oleh Kementerian Pelancongan, Seni dan Budaya Malaysia. Selain itu, elemen dalam kurikulum tersebut adalah selari dengan aspirasi UNESCO yang bekehendakkan setiap negara memelihara warisan bangsa dan memupuk kreativiti dalam kalangan murid. Dalam kurikulum ini, murid didedahkan dengan kesenian dan kebudayaan tempatan dan luar negara menerusi mata pelajaran Seni Muzik, Seni Teater, Seni Tari dan Seni Visual.

KPM komited untuk memastikan kesenian dan kebudayaan yang diterapkan dalam kurikulum sekolah dapat memberi pengetahuan kepada murid untuk menghayati budaya warisan Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN CHARLES ANTHONY SANTIAGO
[KLANG]
TARIKH : 30 NOVEMBER 2021 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI KEWANGAN** menyatakan kesediaan Kerajaan untuk membayar balik jumlah simpanan yang telah dikeluarkan oleh kumpulan B40 semasa pandemik di bawah i-Lestari/i-Sinar/i-Citra. Ini adalah untuk membantu golongan B40 yang bakal bersara dalam lima tahun yang akan datang tanpa wang persaraan bagi mengelakkan kemiskinan warga emas yang baru.

JAWAPAN

Tan Sri Yang di-Pertua,

1. Pengeluaran dari akaun simpanan persaraan di KWSP merupakan **kemudahan** yang ditawarkan kepada pencarum untuk membantu meringankan beban kewangan ketika tempoh pandemik COVID-19. Pencarum juga telah dimaklum akan implikasi apabila pengeluaran dibuat dan mereka perlu membuat penilaian dan pertimbangan sewajarnya. Buat masa ini, Kerajaan tidak mempunyai sebarang perancangan bagi membayar balik pengeluaran yang telah dibuat oleh pencarum memandangkan ia merupakan satu kemudahan dan bukan bersifat *obligatory*.

2. Bagi membantu meningkatkan semula simpanan ahli, caruman baharu yang diterima daripada ahli-ahli yang terlibat akan dikreditkan ke dalam Akaun 1 sepenuhnya sehingga keseluruhan amaun pengeluaran yang diambil daripada Akaun 1 diganti semula. Setelah itu, pecahan

caruman akan kembali kepada 70 peratus untuk Akaun 1 dan 30 peratus untuk Akaun 2.

3. Selain itu, bagi membantu ahli yang masih bekerja selepas persaraan wajib, caruman oleh pekerja dikecualikan dan hanya majikan akan membuat caruman KWSP.

Tan Sri Yang di-Pertua,

4. Tahun 2022 dijangka sebagai tahun pemulihan, di mana sektor ekonomi dijangka akan dibuka sepenuhnya. Oleh itu, di bawah Bajet 2022, Kerajaan akan memastikan peluang untuk mendapatkan pekerjaan dan menjana pendapatan adalah lebih baik supaya golongan B40 dan M40 khususnya dapat membina semula kehidupan dan mempunyai lebihan pendapatan untuk kembali menyimpan bagi hari persaraan.

5. Antaranya adalah melalui inisiatif JaminKerja, di mana sebanyak 600 ribu peluang pekerjaan baharu bakal diwujudkan dengan peruntukan berjumlah 4.8 bilion ringgit. Inisiatif ini penting supaya kadar pengangguran dapat diturunkan kepada 4 peratus menjelang penghujung 2022.

6. Pada masa yang sama, di bawah Bajet 2022 juga, Kerajaan komited untuk terus membantu golongan yang terjejas akibat COVID-19, tidak kira golongan B40 atau M40.

7. **Bagi golongan B40**, antara langkah yang diperkenalkan termasuklah:

- a) menambah baik bantuan tunai di bawah inisiatif Bantuan Keluarga Malaysia (BKM) dengan peruntukan berjumlah 8.2 bilion ringgit, dan dijangka memanfaatkan 9.6 juta penerima. Sebagai pembaharuan, ibu atau bapa tunggal yang mempunyai anak tanggungan dan berpendapatan bulanan sehingga 5,000 ringgit akan menerima tambahan sebanyak 500 ringgit. Selain itu, bantuan tambahan sebanyak 300 ringgit lagi turut diberikan kepada isi rumah warga emas;

- b) memastikan pendidikan berkualiti melalui peruntukan berjumlah 450 juta ringgit untuk Bantuan Awal Persekolahan. Melalui Bajet 2022, bantuan ini telah ditingkatkan sebanyak 50 ringgit, di mana Keluarga Malaysia yang layak akan menerima 150 ringgit untuk menampung keperluan sekolah;
- c) pemberian tablet kepada golongan siswa B40 yang melanjutkan pengajian tinggi melalui inisiatif PerantiSiswa. Inisiatif ini telah diperuntukkan 450 juta ringgit oleh Kerajaan, di mana syarikat telekomunikasi akan turut menyumbang sejumlah 65 juta ringgit bagi menjayakan program ini;
- d) meningkatkan nilai baucar Perlindungan Tenang kepada 75 ringgit, di mana ini juga boleh digunakan untuk membeli polisi insurans motosikal;
- e) meringankan kos perubatan dan kesihatan melalui perluasan skim MySalam kepada penerima BKM. Manfaat tuntutan kos peranti perubatan juga akan dipanjangkan kepada anak tanggungan penerima mySalam yang layak;
- f) mengedarkan kit asas kebersihan diri setiap bulan kepada 130 ribu remaja wanita secara percuma. Inisiatif ini akan dilaksanakan melalui Lembaga Penduduk dan Pembangunan Keluarga Malaysia, dengan kerjasama Jabatan Penjara Malaysia dan diperuntukkan 10 juta ringgit; dan
- g) menyediakan subsidi pembelian kerusi keselamatan kanak-kanak sebanyak 50 peratus atau sehingga 150 ringgit untuk menggalakkan penggunaan kerusi keselamatan di dalam kereta. Sejumlah 30 juta ringgit disediakan untuk tujuan ini dan bakal memanfaatkan 188 ribu keluarga; dan
- h) pengkreditan e-tunai bernilai 150 ringgit secara *one-off* untuk golongan belia melalui Skim Transaksi Tanpa Tunai, atau *e-Start*.

8. Selanjutnya, **untuk golongan M40**, Bajet 2022 **telah menyediakan pelbagai pengecualian dan pelepasan cukai** yang bakal memberi penjimatan, dan pada masa yang sama, menggalakkan perbelanjaan demi merangsang ekonomi. Ini termasuklah:

- a) tidak mengenakan cukai keuntungan harta tanah bagi pelupusan mulai tahun ke enam dan ke atas;
- b) pengecualian cukai jualan kereta; dan
- c) pelepasan khas cukai pendapatan individu bagi pembelian komputer, perbelanjaan menghadiri kursus peningkatan kemahiran, pelancongan domestik dan lain lain.

9. Secara keseluruhan, kesemua pendekatan yang dilaksanakan Kerajaan mempunyai objektif yang sama, iaitu meringankan aliran tunai dan beban golongan B40 dan M40 tanpa mengira bangsa, agama dan kaum.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. SHAHRUDDIN BIN MD. SALLEH
[SRI GADING]**

TARIKH : 30 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan usaha-usaha yang konkrit dalam menangani isu kesihatan mental di kalangan mahasiswa khususnya ketika negara dilanda pandemik COVID-19.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa prihatin dan peka dalam memastikan kebajikan serta kesejahteraan mental dan emosi mahasiswa sentiasa terjaga, terutamanya dalam tempoh pandemik COVID-19 yang melanda negara sejak lebih setahun yang lalu.

Atas dasar keprihatinan ini, KPT melalui pihak Universiti Awam (UA) menyediakan pelbagai kemudahan perkhidmatan kaunseling dan sokongan psikososial kepada mahasiswa yang melibatkan hampir 150 orang kaunselor dan pakar psikologi terdapat di UA. Selain secara fizikal atau, dengan izin, *walk-in*, perkhidmatan yang sama turut ditawarkan melalui talian *hotline* dan juga secara dalam talian. Dalam hubungan ini, beberapa kaedah telah dikenal pasti bagi menyaring tahap kesihatan mental mahasiswa, iaitu melalui *online-self screening* menggunakan

Depression Anxiety Stress Scale (DASS), e-kaunseling berkelompok dan e-psikologi.

Selain itu, KPT juga bekerjasama dengan Majlis Kaunseling dan Kerjaya Universiti Awam Malaysia (MAKUMA) membangunkan Modul Kesihatan Mental Pelajar IPT bagi menangani tekanan, kemurungan dan kebimbangan pelajar. Modul ini merupakan garis panduan kepada pegawai di UA bagi menguruskan kes kesihatan mental yang melibatkan mahasiswa UA secara lebih komprehensif dan efisien.

Dalam perkara berkaitan, pelbagai program kesedaran berkenaan dengan kesihatan mental turut dianjurkan. Sepanjang tahun 2021, pihak UA dengan kerjasama MAKUMA telah berjaya menganjurkan hampir 560 program kaunseling serta pengurusan tekanan dan emosi sama ada secara dalam talian mahupun fizikal. Contohnya ialah Live Instagram 3.0: Kaunselor Saya Nak Bertanya oleh UPM; Program *Counselling: Mental and Emotional Well-Being 15* oleh UiTM (Shah Alam); dan Webinar Kaunseling: Kenali Simptom dan Bantuan Awal Kesihatan Mental oleh UMT. Pihak politeknik dan kolej komuniti juga tidak ketinggalan menganjurkan pelbagai program kesedaran, kerohanian dan sesi kaunseling individu dan berkelompok yang melibatkan kira-kira 2,377 pelajar.

Insyaa Allah, program-program seumpama ini akan diteruskan pelaksanaannya pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI [LUMUT]**

TARIKH : 30 NOVEMBER 2021 (SELASA)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI TENAGA DAN SUMBER ASLI** menyatakan langkah-langkah yang diambil untuk memelihara hutan paya bakau dan zon riparian bagi memastikan kelestarian alam sekitar dijaga dan sumber pendapatan nelayan pantai terjaga.

JAWAPAN

Tuan Yang di-Pertua,

1. Ekoran bencana tsunami yang melanda negara pada 26 Disember 2004, Kerajaan Persekutuan telah meningkatkan usaha untuk memelihara dan memulihara kawasan hutan paya laut di seluruh negara. Antara langkah-langkah yang telah diambil oleh Kementerian Tenaga dan Sumber Asli (KeTSA) dan jabatan serta agensi kerajaan yang berkaitan adalah seperti berikut:

- i) mempergiatkan usaha pemuliharaan ekosistem hutan paya laut dan pesisiran pantai negara melalui 'Program Penanaman Pokok Bakau dan Spesies-spesies yang Sesuai di Pesisiran Pantai Negara' sejak 2006. Sehingga 31 September 2021, sebanyak 6.95 juta pokok berjaya di tanam dengan keluasan seluas 3,072 hektar di mana sebanyak 6.38 juta pokok adalah dari spesies pokok bakau dan 571 ribu pokok rhu serta lain-lain spesies;
- ii) melaksanakan kajian untuk mengenal pasti kaedah penanaman yang sesuai untuk memulihara kawasan pesisiran pantai. Institut Penyelidikan Perhutanan Malaysia (FRIM) telah memperkenalkan teknik inovatif *Comp-Mat* dan *Comp-Pillow* sebagai kaedah penanaman terbaik untuk spesies pokok bakau dengan kadar kemandirian yang tinggi. Kajian ini turut membantu mengurangkan fenomena hakisan pantai negara yang serius;
- iii) mewartakan seluas 89,693 hektar kawasan hutan paya laut sebagai hutan simpanan kekal (HSK). Selain itu, Jabatan Perhutanan Semenanjung Malaysia (JPSM) juga telah mengenalpasti sejumlah 15,429 hektar lagi sebagai cadangan hutan simpanan kekal (CHSK) untuk hutan paya laut;

SOALAN NO : 28

- iv) sejak tahun 2010, Kerajaan Negeri Sabah telahewartakan seluas 39,833 hektar kawasan hutan paya laut dan tanah lembap sebagai kawasan hutan simpan di bawah kelas Hutan Simpan Perlindungan (Kelas I) dan Hutan Simpan Bakau (Kelas V) sebagai langkah untuk memelihara hutan paya laut dan zon riparian;
- v) menjalin usaha sama dengan *International Society for Mangrove Ecosystems* (ISME), sebuah badan bukan kerajaan antarabangsa yang berpusat di Jepun di mana pihak ISME menyalurkan dana berjumlah 5.5 juta yen setiap tahun untuk tujuan restorasi hutan bakau terpilih di seluruh Sabah; dan
- vi) menjalin kerjasama dengan agensi-agensi kerajaan negeri serta syarikat-syarikat swasta di Sarawak untuk projek rehabilitasi hutan paya laut di Kuching Wetland National Park, Selabat, Buntal, Lundu, Simunjan, Kuala Rajang, Kuala Niah, Sibuti, Mukah dan Kuala Lawas.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN NURUL IZZAH BINTI ANWAR

TARIKH : 30 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan status kajian pindaan Section 3(1) Akta Perlindungan Data Peribadi 2010 agar meliputi Kerajaan negeri dan Kerajaan pusat, memandangkan peningkatan penggunaan teknologi oleh kerajaan serta transformasi digital sektor awam yang menjadi salah satu matlamat Rangka Tindakan MyDIGITAL.

JAWAPAN

Tuan Yang di-Pertua,

Kementerian ini melalui Jabatan Perlindungan Data Peribadi (JPDP) telah menguatkuasakan Akta Perlindungan Data Peribadi 2010 [Akta 709] pada 15 November 2013 bertujuan untuk mengawal selia pemprosesan data peribadi individu yang terlibat dalam urusan niaga komersial oleh pengguna data supaya tidak disalah guna dan disalah pakai oleh pihak-pihak yang berkepentingan.

Akta 709 adalah terpakai kepada mana-mana orang yang memproses dan mempunyai kawalan terhadap atau membenarkan pemprosesan apa-apa data peribadi berkenaan dengan transaksi komersial. Walaupun Kerajaan Persekutuan dan Kerajaan Negeri dikecualikan daripada pematuhan kepada Akta 709, namun Akta ini masih terpakai kepada Badan Berkanun dan Pihak Berkuasa Tempatan.

Memandangkan pendekatan sosial, ekonomi dan budaya masyarakat kian berubah berbanding 10 tahun dahulu, Akta 709 telah dikaji semula agar selari dengan perubahan dan perkembangan polisi perlindungan data peribadi di peringkat global. Kajian awal semakan semula Akta 709 telah dimulakan pada suku pertama tahun 2019 dan kini di peringkat permurnian sebelum dikemukakan kepada Jabatan Peguam Negara (AGC) untuk kelulusan.

Pemakaian Akta 709 kepada Kerajaan Persekutuan dan Kerajaan Negeri merupakan salah satu cadangan penambahbaikan yang telah menerima persetujuan responden Kertas Rundingan Awam. Akta 709 mengawal selia pemprosesan data peribadi dalam transaksi komersial yang lebih menjurus kepada sektor swasta. Urusan pembayaran yang melibatkan sektor awam pula adalah lebih merupakan perkhidmatan yang diberikan untuk memenuhi keperluan perundangan yang mengawal selia urusan tersebut dan tidak bermotifkan keuntungan.

Kajian yang mendalam ke atas cadangan ini mendapati cadangan tersebut tidak dapat dilaksanakan dalam jangka masa terdekat memandangkan setiap agensi Kerajaan yang ditubuhkan mempunyai akta dan pekeliling tertentu yang mengawal selia aktiviti, pelaksanaan dan pematuhan perundangannya. Selain itu, sektor awam juga diwajibkan mematuhi Akta Rahsia Rasmi 1972 [Akta 88] dan Arahan Keselamatan (Semakan dan Pindaan 2017) yang lebih menyeluruh termasuk keselamatan ICT.

Sektor Kerajaan juga ditadbir urus oleh Pejabat Ketua Pengarah Keselamatan Kerajaan Malaysia yang berperanan memastikan pematuhan kepada dasar keselamatan peribadi pegawai awam dan pihak swasta berkaitan. Selain itu, Agensi Keselamatan Siber Negara (*National Cyber Security Agency – NACSA*) telah diwujudkan di bawah Majlis Keselamatan Negara (MKN) pada 1 Februari 2017 sebagai satu agensi pusat utama bagi semua perkara berkaitan keselamatan siber negara termasuk keselamatan siber sektor awam.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 30 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan langkah-langkah yang diambil bagi memastikan kemudahan kediaman dalam kampus di universiti-universiti awam diberikan kepada kumpulan mahasiswa B40.

JAWAPAN

Tan Sri Yang di-Pertua,

Aspek kesejahteraan dan kebajikan sentiasa menjadi keutamaan Kementerian Pengajian Tinggi (KPT) dalam memastikan kemudahan kediaman dalam kampus kondusif, terutamanya untuk mahasiswa golongan B40. Ini penting kerana kedua-dua aspek, iaitu kesejahteraan dan kebajikan, turut secara tidak langsung memberikan kesan kepada proses Pengajaran dan Pembelajaran (PdP) yang dilalui.

Untuk makluman, semua pelajar Tahun 1 diberikan keutamaan untuk mendapat kemudahan kediaman dalam kampus dan premis luar kampus yang diuruskan oleh Universiti Awam (UA). Ini bagi memberikan pengalaman penuh merasai semua kemudahan yang disediakan dan untuk membiasakan diri dengan persekitaran kampus.

Sementara itu, penyediaan kemudahan kediaman kepada golongan pelajar selain pelajar Tahun 1 atau pelajar kanan adalah berdasarkan kriteria yang telah digariskan oleh UA masing-masing. Dalam hubungan ini, **keutamaan permohonan penginapan dalam kampus diberikan kepada pelajar golongan B40 dan pelajar berkeperluan**. Faktor lain seperti **tahap keterlibatan dan keaktifan pelajar** dalam program-program di kampus juga **turut diambil kira** dalam memberikan kemudahan ini.

Sehingga 25 Oktober 2021, UA telah menyediakan kemudahan penginapan dalam kampus kepada seramai **63,695 orang mahasiswa**. Majoritinya merupakan pelajar golongan B40 berkeperluan yang telah mula memasuki kampus secara fizikal bagi sesi akademik Semester 1 Tahun 2021/2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 30 NOVEMBER 2021 (SELASA)

SOALAN

Minta **MENTERI PENGAJIAN TINGGI** menyatakan usaha dan inisiatif yang diambil bagi meningkatkan peluang dan sokongan dalam industri kajian penyelidikan dan pembangunan (R&D) dalam kalangan mahasiswa di universiti-universiti tempatan.

JAWAPAN

Tan Sri Yang di-Pertua,

Salah satu usaha dan inisiatif Kementerian Pengajian Tinggi (KPT) dalam memastikan mahasiswa di Institusi Pendidikan Tinggi (IPT) turut diberi peluang dan sokongan untuk terlibat dalam penyelidikan dan pembangunan (R&D) adalah melalui *Public-Private Research Network* atau, ringkasnya PPRN. PPRN merupakan inisiatif inovatif yang berkonsepkan model kerjasama antara syarikat dan akademik yang bertujuan untuk membantu meningkatkan tahap produktiviti syarikat dan menyelesaikan masalah yang dihadapi oleh pihak industri melalui inovasi dan teknologi.

Bagi maksud ini, KPT sentiasa menggalakkan penyelidik melibatkan mahasiswa sebagai Pembantu Penyelidik atau, dengan izin, *Research Assistants* (RAs) bagi memberikan mereka peluang dan pengalaman

bekerjasama dengan industri dalam menyelesaikan masalah sebenar secara *hands-on*. Selain daripada mempunyai potensi untuk terus diambil bekerja oleh industri berkenaan, mahasiswa juga boleh menggunakan kemahiran dan pengalaman semasa terlibat dalam projek PPRN sebagai nilai tambah untuk meningkatkan kadar kebolehpasaran dan daya saing mereka setelah bergraduasi kelak.

Sejak dilancarkan pada tahun 2015, sejumlah 608 projek telah diluluskan, dan 562 syarikat telah menerima geran padanan melalui inisiatif PPRN 1.0 yang berjumlah hampir RM22.9 juta (RM22,888,345.00). Bermula Oktober 2019, melalui PPRN 2.0, sebanyak 59 projek bernilai kira-kira RM4.6 juta (RM4,552,805.25) telah diluluskan melibatkan 59 buah syarikat dalam bidang pembuatan, pembinaan, pertanian, perkhidmatan serta perlombongan dan pengkuarian.

Penglibatan mahasiswa dalam projek PPRN merupakan usaha dan inisiatif yang unik kerana ia berpacuan permintaan industri. Pelaksanaan projek PPRN menghasilkan sinergi yang baik impak daripada gabungan idea dan minda yang padu, serta penggemblengan tenaga daripada pakar bidang, industri dan mahasiswa. Kolaborasi bagi menambah baik produk atau proses di syarikat yang terlibat dilihat berupaya meningkatkan produktiviti syarikat, termasuk menambah hasil jualan, mengurangkan tenaga kerja, menambah baik aspek kualiti produk atau proses, kebersihan, keselamatan dan sebagainya.

Kajian Impak Pelaksanaan PPRN yang dilaksanakan oleh *Malaysia Productivity Corporation* (MPC) pada tahun 2019 menunjukkan bahawa secara puratanya, terdapat 30 peratus peningkatan produktiviti selepas pelaksanaan projek PPRN ini. Justeru, PPRN membuktikan kolaborasi antara industri dan akademik merupakan inisiatif menang-menang, yang bukan sahaja memberikan manfaat kepada industri, tetapi juga kepada penyelidik termasuk pensyarah dan mahasiswa di IPT.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 30 NOVEMBER 2021 (SELASA)

SOALAN

minta **MENTERI PENGAJIAN TINGGI** menyatakan dengan berkongsi H-index, G-index dan i10-Index setiap Naib Canselor di Universiti Awam (UA) yang telah dilantik dari Mac 2020 sehingga 25 Oktober 2021, dan bandingkannya dengan Naib Canselor sebelum mereka.

JAWAPAN

Tan Sri Yang di-Pertua,

Kriteria utama yang dinilai bagi calon Naib Canselor adalah kemahiran, kemampuan dan pengalaman dalam pentadbiran institusi akademik. Dalam hubungan ini, selain daripada *Curriculum Vitae* (CV) akademik, calon juga perlu menyediakan CV kepimpinan yang dapat membantu Jawatankuasa Tetap Pemilihan Naib Canselor Universiti Awam menilai bukan sahaja pencapaian akademik bahkan juga ciri-ciri penting sebagai pemimpin institusi dan dapat dibuktikan berdasarkan impak yang ditunjukkan melalui kejayaan calon menerajui program-program yang signifikan terhadap pembangunan universiti.

Calon Naib Canselor juga haruslah mempunyai iltizam untuk menjadikan universiti sebagai institusi yang memberikan sumbangan besar kepada masyarakat dan negara, mempamerkan tahap kepimpinan

yang cemerlang, mengetahui selok-belok aktiviti akademik, penyelidikan dan kepentingan libat urus bersama pihak industri dan komuniti, menjadi rujukan *peers* di peringkat kebangsaan dan antarabangsa yang seterusnya membawa jenama universiti ke peringkat yang lebih tinggi serta mempunyai *authority* dalam bidang kepakaran dan disiplin ilmunya. Sumbangan calon turut dapat dinilai melalui pengiktirafan dan peranannya dalam dunia akademik, affiliasi dalam pertubuhan dan badan profesional berprestij serta anugerah-anugerah lain yang mengenengahkan sumbangan calon kepada masyarakat tempatan dan antarabangsa.

Pihak Kementerian tidak menafikan kepentingan pengukuran H-Index bagi seseorang ahli akademik termasuk Naib Canselor. Namun begitu, pencapaian calon Naib Canselor dalam penyelidikan dan penerbitan melalui pengukuran H-Index bukanlah satu-satunya indikator yang dapat menentukan kemampuan calon untuk mentadbir universiti. Apa yang lebih utama adalah Naib Canselor perlu memahami dan menguasai selok-belok tadbir urus yang baik (*good governance*) serta membawa universiti mencapai misi dan visi penubuhannya.

Perbandingan H-Index dan G-Index Scopus Naib-Naib Canselor sedia ada dan mantan Naib-Naib Canselor adalah seperti dilampirkan.

**SENARAI NAIB CANSELOR/ REKTOR UNIVERSITI AWAM
(LANTIKAN SEBELUM MAC 2020 SEHINGGA 25 OKTOBER 2021)**

BIL	UA	NAMA	TARIKH LANTIK	H-Index	G-Index
1	UM	YBhg. Datuk Ir. Abdul Rahim Hashim	01.11.2017	-	-
2		YBhg. Dato' Prof. Ir. Dr. Mohd Hamdi Abd Shukor	01.11.2020	4	4
3	USM	YBhg. Datuk Prof. Dr. Asma binti Ismail	04.10.2016	18	24
4		YBhg. Dato' Prof. Dr. Faisal Rafiq Mahmad Adikan	04.10.2019	22	46
5	UKM	YBrs. Prof. Ir. Dr. Mohd Hamdi Abd Shukor	01.01.2019	4	4
6		YBhg. Dato' Prof. Ts. Dr. Mohd Ekhwan Toriman	01.01.2021	20	32
7	UPM	YBhg. Datin Paduka Prof. Dr. Aini binti Ideris	01.01.2016	24	32
8		YBrs. Prof. Dr. Mohd Roslan Sulaiman	01.09.2020	31	46
9	UTM	YBhg. Datuk Prof. Ir. Dr. Wahid bin Omar	01.09.2013	14	23
10		YBhg. Datuk Prof. Ts. Dr. Ahmad Fauzi bin Ismail	01.01.2021	87	149
11	UIAM	YBhg. Dato' Sri Prof. Dr. Zaleha Kamaruddin	02.08.2011	1	2
12		YBhg. Tan Sri Dato' Prof. Emeritus Dzulkifli Abdul Razak	31.07.2020	2	2
13	UiTM	YBhg. Datuk Prof. Emeritus Ir. Dr. Mohd Azraai Kassim	15.02.2019	11	20
14		YBrs. Prof. Ts. Dr. Roziah Mohd Janor	09.08.2021	6	9
15	UUM	YBhg. Dato' Seri Prof. Dr. Mohamed Mustafa bin Ishak	16.06.2010	0	0
16		YBhg. Dato' Prof. Dr. Ahmad Bashawir Haji Abdul Ghani	26.08.2018	9	11

**SENARAI NAIB CANSELOR/ REKTOR UNIVERSITI AWAM
(LANTIKAN SEBELUM MAC 2020 SEHINGGA 25 OKTOBER 2021)**

BIL	UA	NAMA	TARIKH LANTIK	H-Index	G-Index
17	UNIMAS	YBhg. Prof. Dr. Morshidi bin Sirat	01.04.2011	10	22
18		YBhg. Datuk Prof. Dr. Mohamad Kadim bin Suaidi	15.12.2020	7	9
19	UMS	YBhg. Datuk Prof. Dr. D Kamarudin D Mudin	18.06.2017	1	1
20		YBhg. Datuk Prof. Dr. Taufiq Yap Yun Hin	30.7.2019	53	79
21	UPSI	YBhg. Dato' Prof. Dr. Mohamad Shatar bin Sabran	24.02.2017	0	0
22		YBhg. Dato' Prof. Dr. Md Amin Md Taff	24.06.2021	-	-
23	USIM	YBhg. Dato' Prof. Dr. Musa bin Ahmad	16.08.2014	25	41
24		YBhg. Dato' Prof. Dr. Mohamed Ridza bin Wahiddin	23.09.2019	15	22
25	UMT	YBhg. Dato' Prof. Dr. Nor Aieni binti Mokhtar	13.04.2015	2	2
26		YBrs. Prof. Dr. Mazlan Abd. Ghaffar	02.08.2021	18	25
27	UTHM	YBhg. Datuk Prof. Dr. Mohd. Noh bin Dalimin	16.10.2008	5	8
28		YBhg. Datuk Prof. Ts. Dr. Wahid Razzaly	15.04.2020	3	3
29	UTeM	YBhg. Datuk Prof. Dr. Shahrin bin Sahib@Sahibuddin	16.06.2014	8	14
30		YBhg. Datuk Wira Prof. Dr. Raha Abdul Rahim	16.06.2019	37	56
31	UMP	YBhg. Dato' Prof. Dr. Daing Mohd. Nasir bin Daing Ibrahim	16.05.2008	6	13
32		YBrs. Prof. Ir. Dr. Wan Azhar Wan Yusoff	16.05.2019	1	3

**SENARAI NAIB CANSELOR/ REKTOR UNIVERSITI AWAM
(LANTIKAN SEBELUM MAC 2020 SEHINGGA 25 OKTOBER 2021)**

BIL	UA	NAMA	TARIKH LANTIK	H-Index	G-Index
33	UniMAP	YBrs. Prof. Ir. Ts. Dr. R. Badlishah Ahmmad	15.05.2019	21	34
34		YBrs. Lt Kol Prof. Ts. Dr. Zaliman bin Sauli	09.08.2021	8	11
35	UniSZA	YBhg. Dato' Prof. Dr. Ahmad Zubaidi Bin A. Latif	01.02.2016	7	13
36		YBhg. Dato' Prof. Dr. Hassan Basri Awang Mat Dahan	01.02.2019	2	3
37	UMK	YBhg. Dato' Prof. Dr. Husaini Omar	01.1.2018	7	11
38		YBhg. Dato' Prof. Ts. Dr. Noor Azizi Ismail	07.01.2019	9	17
39	UPNM	YBhg. Lt. Jen. Datuk Abdul Halim Haji Jalal	01.05.2018	-	-
40		YBhg. Leftenan Jeneral Dato' Hasagaya bin Abdullah	19.12.2020	-	-

***Tarikh
kemaskini***

26-Nov-2021

Sumber : Scopus

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW (SIBU)

TARIKH : 30 NOVEMBER 2021 (SELASA)

SOALAN

TUAN OSCAR LING CHAI YEW (SIBU) minta **MENTERI KANAN PENDIDIKAN** menyatakan sekolah daif yang sudah diperbaiki pada tahun 2020 dan 2021, nyatakan jumlah kos yang terlibat mengikut sekolah dan berapa sekolah daif lagi yang belum diperbaiki dan jumlah kos yang diperlukan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik untuk semua sekolah di seluruh negara. Ini adalah penting untuk memastikan pengajaran dan pembelajaran dilaksanakan dalam keadaan selamat serta selesa di sekolah.

Untuk makluman Ahli Yang Berhormat, di bawah Rancangan Malaysia Ke-11 *Rolling Plan 4* (RP4) tahun 2020, KPM telah diluluskan sebanyak 134 projek menaik taraf dan membangun semula bangunan daif di sekolah di seluruh negara dengan kos berjumlah RM994.272 juta. Manakala, di bawah Rancangan Malaysia Ke-12 *Rolling Plan 1* (RP1) tahun 2021, KPM telah diluluskan sebanyak 104 projek menaik taraf dan membangun semula

bangunan daif di sekolah di seluruh negara dengan kos RM1.004 bilion. Perincian status semasa projek tersebut adalah seperti berikut:

Status Projek Bagi Tahun 2020 dan 2021 Berserta Kos Projek

Tahun	Siap	Pembinaan	Pra-bina	Jumlah	Kos Projek (RM juta)
2020	5	64	65	134	994.27
2021	-	-	104	104	1,004.00
Jumlah	5	64	169	238	1,998.27

Berdasarkan rekod KPM, masih terdapat 1,311 buah sekolah yang mempunyai bangunan daif di seluruh negara. Daripada jumlah tersebut, sebanyak 73 buah sekolah mempunyai bangunan daif pada skala 7, iaitu disahkan tidak selamat digunakan oleh Jabatan Kerja Raya (JKR).

Manakala 1,238 buah sekolah lagi mempunyai bangunan daif pada skala 6, iaitu disahkan tidak selamat oleh pihak teknikal Pejabat Pendidikan Daerah atau Jabatan Pendidikan Negeri. Anggaran kos yang dijangka terlibat untuk menaik taraf dan membangun semula bangunan daif di 1,311 buah sekolah adalah berjumlah RM15.077 bilion. Bagaimanapun, pelaksanaan projek ini tertakluk kepada kelulusan agensi pusat dan kedudukan kewangan semasa kerajaan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN TEH KOK LIM [TAIPING]

TARIKH : 30 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan peratusan liputan 3G dan 4G untuk Semenanjung, Sabah dan Sarawak serta 'road map' dalam usaha mencapai liputan 90% ke atas.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah menghasilkan Pelan Jalinan Digital Negara (JENDELA), yang bertujuan untuk menangani isu akses kepada Internet berkualiti bagi perkhidmatan tetap dan mudah alih.

Setakat suku ketiga tahun 2021, peratusan jalur lebar 4G di kawasan berpenduduk di seluruh negara adalah sebanyak 94.39%, manakala pecahan liputan bagi setiap negeri adalah seperti berikut:

Negeri	% Liputan 4G di Kawasan Berpenduduk di Seluruh Negara (Suku Ketiga 2021)
W.P. Putrajaya	100.00%
W.P. Kuala Lumpur	100.00%
Pulau Pinang	99.70%
Selangor	99.60%

Melaka	99.11%
Perlis	99.07%
Johor	98.00%
W.P. Labuan	97.98%
Kedah	96.26%
N. Sembilan	96.09%
Perak	95.58%
Terengganu	94.71%
Kelantan	93.91%
Pahang	90.46%
Sabah	83.90%
Sarawak	81.37%
Malaysia	94.39%

***Tiada pengiraan dilakukan untuk liputan 3G kerana rangkaian 3G telah mula ditamatkan secara berperingkat bermula Januari 2021.**

Pelaksanaan pelan JENDELA Fasa 1 yang bermula pada September 2020 memberi fokus kepada peluasan liputan gentian optik dan pembangunan infrastruktur digital termasuk pembinaan tapak 4G baharu dan menaiktaraf stesen pemancar sedia ada kepada 4G bagi meningkatkan liputan dan kualiti perkhidmatan 4G di seluruh negara. Pencapaian JENDELA sehingga 31 Oktober 2021 adalah seperti berikut:

- a. Penambahan sebanyak 1.58 juta premis daripada 4.96 juta premis yang menjadikan jumlah keseluruhan sebanyak 6.54 juta premis di seluruh negara telah disediakan dengan akses gentian optik;
- b. Kelajuan jalur lebar mudah alih meningkat daripada 25Mbps kepada 34.46 Mbps; dan
- c. Peluasan liputan jalur lebar mudah alih 4G daripada 91.8% kepada 94.39% di kawasan berpenduduk.

Pihak Kerajaan juga sedang di dalam proses untuk menutup rangkaian 3G agar spektrum yang digunakan dapat digunakan untuk meningkatkan kecekapan perkhidmatan teknologi 4G yang dapat menyediakan kelajuan capaian internet yang lebih tinggi. Sehingga 31

Oktober 2021, sebanyak 1.3 juta pelanggan 3G sedia ada telah beralih kepada 4G dan 112,000 rangkaian 3G telah ditutup untuk menambahbaik liputan dan kualiti perkhidmatan teknologi 4G.

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar dan pedalaman melalui program Pemberian Perkhidmatan Sejagat (USP) seperti berikut:

- a. Melalui kaedah penyumbang utama, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara. Di samping itu juga, sebanyak 1,661 menara baharu akan dilaksana secara kaedah tender terbuka di kawasan-kawasan luar bandar dan pedalaman di seluruh negara melalui pelantikan Penyedia Perkhidmatan Sejagat yang Dilantik atau *Designated Universal Service Provision* pada suku keempat tahun 2021 untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia, penghujung 2022 nanti.
- b. Manakala di kawasan pedalaman di Sabah dan Sarawak serta perkampungan Orang Asli, penyediaan perkhidmatan jalur lebar akan dipercepatkan melalui kaedah penyediaan perkhidmatan jalur lebar secara kolektif menggunakan teknologi satelit. Bagi tujuan ini, sebanyak 839 lokasi di seluruh negara telah dikenalpasti bagi memastikan ianya dapat memberikan liputan jalur lebar di kawasan-kawasan yang sukar diakses dengan teknologi gentian optik dan mudah alih.

Secara umumnya, pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Pihak SKMM akan mempercepatkan sedaya mungkin pembinaan menara namun ianya bergantung kepada kelulusan yang dikeluarkan pihak tertentu seperti Pihak Berkuasa Negeri (PBN) dan Pihak Berkuasa Tempatan (PBT). Kerjasama serta komitmen Kerajaan Negeri dan semua pihak adalah penting bagi memastikan kesemua cadangan dasar yang telah diluluskan di peringkat pusat, dapat diaplikasikan di peringkat negeri dan PBT agar penyediaan infrastruktur digital dapat dimudahcara serta mengikut piawaian yang tertentu bagi memastikan Aspirasi Nasional dapat dicapai.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KE-EMPAT
PARLIMEN KE-EMPAT BELAS**

PERTANYAAN : JAWAB LISAN

DARIPADA : YB TUAN CHOW KON YEOW (TANJONG)

TARIKH : 30 NOVEMBER 2021 (SELASA)

SOALAN

TUAN CHOW KON YEOW [TANJONG] minta **MENTERI PENGANGKUTAN** menyatakan status terkini kajian Pelan Strategik Lapangan Terbang Negara (NASP) dan projek naik taraf Lapangan Terbang Antarabangsa Pulau Pinang (PIA). Jelaskan sebab penangguhan sekiranya ia masih tidak akan dilaksanakan dan perincian jangka masa ia akan disiapkan sekiranya projek naik taraf akan berjalan.

JAWAPAN

Tuan Yang di-Pertua,

1. Penularan wabak COVID-19 telah memberi kesan negatif terhadap industri penerbangan negara terutama kemampuan MAHB untuk membiayai projek Lapangan Terbang Antarabangsa Pulau Pinang (LTAPP). Dalam hubungan ini, syarikat penerbangan dijangka memerlukan tempoh masa sehingga tahun 2025 untuk pulih sepenuhnya dari impak wabak COVID-19, tertakluk kepada situasi semasa penularan wabak tersebut di dalam dan luar negara.
2. Berdasarkan perkembangan terkini dan kekurangan permintaan dalam industri penerbangan negara, projek ini akan ditangguhkan sehinggalah industri penerbangan dipulihkan. Untuk tempoh ini, Kerajaan sedang menyelesaikan beberapa isu termasuk pengambilan tanah bagi membolehkan projek naiktaraf LTAPP dilaksanakan setelah industri penerbangan pulih.
3. Pada masa yang sama, bagi memastikan keperluan pembangunan jangka panjang lapangan terbang/ padang terbang di Malaysia berdasarkan keperluan industri semasa mengambil kira impak COVID-19 dan keperluan sistem jaringan kesalinghubungan pengangkutan negara, Kementerian Pengangkutan akan melaksanakan kajian *National Airports Strategic Plan* (NASP) yang akan bermula pada penghujung tahun 2021 dan dijangka akan dimuktamadkan pada pertengahan tahun 2023.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATUK SERI SAIFUDDIN NASUTION BIN ISMAIL [KULIM-BANDAR BHARU]
TARIKH : 30 NOVEMBER 2021 (SELASA)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan strategi Kerajaan untuk menangani keadaan sumber *revenue* yang terhad berbanding komitmen subsidi, emolumen, pencen dan bayaran hutang.

JAWAPAN

Tan Sri Yang di-Pertua,

1. Untuk makluman Ahli Yang Berhormat, komitmen kewangan Kerajaan, termasuklah subsidi, emolumen, pencen dan bayaran hutang, diperuntukkan kesemuanya di bawah belanja mengurus Kerajaan Persekutuan yang dibiayai melalui Akaun Hasil Disatukan. Sumber bagi Akaun Hasil Disatukan ini kebanyakannya adalah menerusi kutipan hasil tahunan, disumbang terutamanya hasil cukai Kerajaan. Justeru, Kerajaan amat peka dan proaktif dalam memastikan hasil yang mampan bagi tempoh pendek dan panjang, sekaligus dapat membiayai perbelanjaan tersebut. Dalam hal ini, bagi memastikan kutipan hasil yang mencukupi untuk menampung perbelanjaan mengurus, maka Kerajaan perlu melaksanakan strategi meningkatkan hasil dan strategi mengoptimumkan perbelanjaan Kerajaan.

2. Antara langkah cukai yang telah diumumkan dalam Bajet 2022 yang dapat menjana kutipan hasil adalah melalui pengenaan cukai pendapatan kepada pemastautin di Malaysia ke atas pendapatan yang terbit daripada sumber di luar negara dan diterima di Malaysia mulai 1 Januari 2022.

Selain itu, produk cecair atau gel mengandungi nikotin yang digunakan dalam rokok elektronik dan *vape* akan dikenakan duti eksais, manakala duti eksais ke atas produk minuman bergula diperluaskan. Nombor pengenalan cukai (dengan izin, *Tax Identification Number* -TIN) juga akan dilaksanakan mulai tahun 2022 bagi memperluaskan asas cukai pendapatan.

3. Kerajaan turut mengumumkan cukai khas iaitu Cukai Makmur dalam Bajet 2022 secara *one-off* kepada syarikat selain perusahaan mikro, kecil dan sederhana (atau PMKS) yang menjana pendapatan bercukai luar biasa tinggi dalam tempoh pandemik COVID-19. Sementara itu, Program Khas Pengakuan Sukarela Jabatan Kastam Diraja Malaysia akan turut dilaksanakan secara berfasa mulai tahun 2022.

4. Bagi memastikan kutipan hasil yang mampan, seperti yang diumumkan semasa pembentangan Bajet 2022, Kerajaan akan membentangkan Akta Tanggungjawab Fiskal pada 2022 di Dewan Yang Mulia ini dengan tujuan untuk meningkatkan tadbir urus, akauntabiliti dan ketelusan dalam pengurusan fiskal negara bagi memastikan kemampanan fiskal dan menyokong kestabilan ekonomi makro. Ini juga akan melihat pelaksanaan Strategi Hasil Jangka Sederhana, atau dengan izin, Medium Term Revenue Strategy (MTRS) untuk mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan. Inisiatif daripada MTRS dijangka akan meningkatkan kutipan hasil Kerajaan Persekutuan serta merancakkan ekonomi negara dalam jangka sederhana.

5. Tambahan lagi, Kerajaan juga sedang melaksanakan Semakan Perbelanjaan Awam, atau dengan izin, Public Expenditure Review dengan kerjasama Bank Dunia bagi memastikan kecekapan dan keberkesanan perbelanjaan awam tanpa menjejaskan sistem penyampaian awam. Ini akan meningkatkan produktiviti perbelanjaan

awam bagi memastikan nilai faedah terbaik bagi setiap ringgit cukai yang dibayar oleh rakyat.

Tan Sri Yang di-Pertua,

6. Selain langkah peningkatan hasil, Kerajaan juga akan terus memantau prestasi perbelanjaan mengurus, termasuk emolumen dengan mengambil kira ruang fiskal yang terhad. Bagi memastikan Kerajaan mampu membiayai komitmen bayaran emolumen yang dianggar mencatat 86.5 bilion ringgit pada tahun 2022, rasionalisasi perbelanjaan serta semakan dasar sedia ada akan sentiasa dilaksanakan berdasarkan keutamaan perbelanjaan seiring dengan prestasi kutipan hasil tahunan. Kerajaan juga akan sentiasa memastikan saiz penjawat awam berada pada had yang optima bagi mengawal perbelanjaan ini. Di samping itu, Kerajaan turut mengkaji dan menyemak dasar sedia ada bagi perbelanjaan lain, seperti bayaran persaraan, dan subsidi, bagi memastikan ia tidak memberi beban jangka masa panjang ke atas kedudukan kewangan Kerajaan Persekutuan.

7. Pada masa yang sama, bagi memperkukuh kedudukan kewangan Kerajaan Persekutuan, Kerajaan mengguna pakai Rangka Kerja Fiskal Jangka Sederhana sebagai panduan dalam menggubal strategi ke arah konsolidasi fiskal jangka sederhana, iaitu dalam tempoh 3 hingga 5 tahun, yang selari dengan pelan pembangunan Rancangan Malaysia Kedua Belas. Perancangan jangka sederhana ini penting bagi memastikan Kerajaan mempunyai ruang fiskal yang selesa dan mencukupi untuk membiayai pembangunan dan melaksanakan langkah kitaran balas dalam menangani situasi luar jangka pada masa hadapan, sekiranya perlu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING (KULAI)

TARIKH : 30 NOVEMBER 2021 (SELASA)

SOALAN

PUAN TEO NIE CHING (KULAI) minta **MENTERI KANAN PENDIDIKAN** menyatakan sama ada Kerajaan berhasrat untuk menyatukan Kementerian/agensi yang bertindih fungsi berkaitan dengan asuhan dan pendidikan awal kanak-kanak awam dan swasta.

JAWAPAN

Tuan Yang di-Pertua,

Untuk makluman Ahli Yang Berhormat, pendidikan awal kanak-kanak di Malaysia diletakkan di bawah fungsi dan kawalan dua kementerian dan akta yang berbeza. Asuhan bagi kanak-kanak yang berumur di bawah 4 tahun tertakluk kepada Akta Taman Asuhan Kanak-Kanak 1984 [*Akta 308*] di bawah fungsi Kementerian Pembangunan Wanita, Keluarga dan Masyarakat (KPWKM). Manakala pendidikan bagi kanak-kanak yang berumur 4 hingga 6 tahun adalah tertakluk kepada Akta Pendidikan 1996 [*Akta 550*] di bawah fungsi Kementerian Pendidikan Malaysia.

Kedua-dua akta iaitu Akta 550 dan Akta 308 serta perundangan subsidiari yang dibuat di bawah akta tersebut mempunyai peruntukan yang khusus dan tidak bertindih bagi maksud pengawalseliaan, penguatkuasaan, penubuhan dan operasi institusi pendidikan awal kanak-kanak. Oleh itu, buat masa ini, KPM akan menggunapakai peruntukan akta sedia ada.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN STEVEN CHONG SHIAU YOON
[TEBRAU]**

TARIKH : 30 NOVEMBER 2021 (SELASA)

SOALAN

TUAN STEVEN CHONG SHIAU YOON [TEBRAU] minta **MENTERI PELANCONGAN, SENI DAN BUDAYA** menyatakan sama ada Kementerian ada perancangan bersama Kerajaan Johor untuk buat Johor Selatan sebagai satu destinasi pelancongan memandangkan sini adalah tempat yang paling selatan di kontinen Asia dan ada banyak tempat seperti Kota Tinggi, Kong Kong Laut, Puteri Harbour, Forrest City, dan Pontian yang berpotensi untuk menarik pelancong-pelancong sekiranya peruntukan yang mencukupi dapat diberi untuk buat kerja menaik-taraf, penyelenggaraan dan promosi.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa bekerjasama dengan semua Kerajaan Negeri bagi menjadikan Malaysia sebagai salah satu destinasi pilihan untuk dikunjungi oleh pelancong-pelancong antarabangsa. Dalam hal ini, kerjasama dengan Kerajaan Negeri Johor juga semestinya tidak terkecuali.

2. Pelbagai kerjasama telah dilaksanakan oleh MOTAC bersama Kerajaan Negeri Johor, termasuklah kerjasama berbentuk pemahiran semula dan peningkatan kemahiran. Antaranya ialah:

- (a) Webinar Semarak Kemerdekaan ke-64 dari Lensa Pelancongan yang merupakan kerjasama antara MOTAC Negeri Johor dan Tourism Johor serta melibatkan 70 penggiat industri pelancongan seperti pemandu pelancongan, syarikat pengendalian pelancongan, institut latihan pelancongan, pengusaha premis penginapan pelancongan dan inap desa;
- (b) Kursus Mesra Malaysia Secara Dalam Talian kepada 25 operator pelancongan yang berdaftar dengan Persatuan Pelancongan Mersing;
- (c) Kursus Mesra Malaysia Secara Dalam Talian kepada 27 Kakitangan Hotel Yang Berdaftar dengan Persatuan Hotel Bajet Malaysia (MyBHA) Johor;
- (d) Taklimat Pengukuhan Organisasi dan Mesyuarat Penyelarasan Program Pengalaman Homestay/Kampungstay Malaysia Tahun 2021 dengan kerjasama ahli akademik Universiti Tun Hussein Onn Malaysia (UTHM) yang merupakan pakar dalam kajian *Community Based Tourism* dan melibatkan seramai 62 orang peserta kluster homestay;

- (e) Kursus Pemasaran Media Sosial (Revolution of Digital Tourism) Siri 1 dan Siri 2 Kepada 145 orang melibatkan agensi di bawah MOTAC serta penggiat industri pelancongan negeri Johor; dan
 - (f) Sesi Libat Urus Bersama 98 Penggiat Industri Pelancongan Negeri Johor Mengenai MyTQA/Tabung/Insentif di bawah MOTAC.
3. Sementara itu, antara kerjasama program promosi Tourism Malaysia dengan Tourism Johor yang telah dan akan dilaksanakan di negeri Johor pada tahun 2021 adalah:
- (a) Program Jelajah Johor 'Cutti-Cutti Malaysia' BMX Ungkal 1.0 2021 pada melibatkan penjelajahan ke seluruh daerah di negeri Johor (Laluan BMX) Pontian – Batu Pahat – Muar – Tangkak – Segamat – Kluang – Mersing – Kota Tinggi (Desaru Coast) – Johor Bahru – Kulai – Pontian;
 - (b) Program Ekspresi Media: *Southern Hidden Gem* Selatan dengan kerjasama Pejabat Daerah Muar serta melibatkan 17 wakil media bertujuan mempromosikan produk-produk baru dan sedia ada pelancongan negeri Johor;
 - (c) Jelajah Jom Jalan Homestay Johor bagi mengemaskini produk-produk yang ditawarkan oleh pengusaha inap desa di negeri Johor dan promosi di media sosial;
 - (d) Jelajah Homestay Johor 'Marilah Pulang Ke Kampung' yang melibatkan pengusaha-pengusaha inap desa di bawah Program Pengalaman Homestay Malaysia di negeri Johor; dan
 - (e) Festival Permainan Tradisional Negeri Johor 2021 pada bulan Disember 2021 dengan kerjasama Tourism Johor dan Yayasan Warisan Johor.

4. Menerusi Pelan Ekopelancongan Kebangsaan 2.0 (2020-2030), MOTAC telah mengenalpasti 60 kluster ekopelancongan di seluruh negara yang berpotensi untuk dibangunkan dan dipromosikan secara bersepadu. Bagi negeri Johor, terdapat lima (5) kluster ekopelancongan yang telah dikenalpasti iaitu:

- (a) RAMSAR Johor – Gunung Pulai – Sungai Johor;
- (b) Kota Tinggi – Sungai Johor – Desaru - Sedili;
- (c) Mersing – Sultan Iskandar Marine Park;
- (d) Kluang – Endau Rompin – Segamat;
- (e) Tangkak – Sagil – Gunung Ledang; dan Batu Pahat – Parit Jawa – Muar

5. Pembangunan secara kluster boleh memastikan destinasi-destinasi ekopelancongan dapat dibangunkan secara lestari menerusi aktiviti-aktiviti berasaskan komuniti atau *Community-Based Tourism* (CBT), Program Pengalaman Homestay Malaysia di bawah MOTAC dapat dikembangkan serta dipromosi secara holistik dan seterusnya destinasi ekopelancongan yang dipromosikan secara bersepadu akan mampu menarik pelancong untuk tinggal lebih lama dan berbelanja lebih banyak.

Sekian, terima kasih.